

**AWIG - AWIG DESA ADAT  
KUSAMBA  
DESA KUSAMBA, KECAMATAN DAWAN  
KABUPATEN KLUNGKUNG**



**KASURAT OLIH  
KRAMA DESA ADAT KUSAMBA  
TAHUN 1993**

DAGING AWIG-AWIG DESA ADAT KUSAMBA

halaman :

MURDHA - C I T T A .....	A
SARGA : I. ARAN LAN WEWIDANGAN DESA .....	1 - 2
SARGA : II. PETITIS LAN PAMIKUKUH .....	2
SARGA : III. SUKRETA TATA PAKRAMAN :	
Palet : 1. Indik Krama .....	2 - 7
Palet : 2. Indik Prajuru .....	7 - 9
Palet : 3. Indik Kulkul .....	9 - 10
Palet : 4. Indik Paruman Utawi Sangkep .....	10 - 11
Palet : 5. Indik Druwen Desa .....	11 - 14
Palet : 6. Sukreta Pamitegep :	
Kaping : 1. Karang, Tegal lan Carik. ....	14
Kaping : 2. Pepayonan .....	15 - 16
Kaping : 3. Wewangunan .....	16 - 17
Kaping : 4. Wewalungan .....	17 - 18
Kaping : 5. Baya lan Dusta .....	18 - 19
Kaping : 6. Penyanggran Banjar .....	19
SARGA : IV. SUKRETA TATA AGAMA :	
Palet : 1. Indik Dewa Yadnya .....	20 - 23
Palet : 2. Indik Rsi Yadnya .....	23 - 24
Palet : 3. Indik Pitra Yadnya .....	24 - 26
Palet : 4. Indik Manusa Yadnya .....	26 - 27
Palet : 5. Indik Bhuta Yadnya .....	27 - 28
SARGA : V. SUKRETA TATA PAWONGAN :	
Palet : 1. Indik Pawiwahan .....	28 - 30
Palet : 2. Indik Nyapian .....	30 - 31
Palet : 3. Indik Sentana .....	31 - 33
Palet : 4. Indik Warisan .....	33 - 35
SARGA : VI. WICARA LAN PAMIDANDA :	
Palet : 1. Indik Wicara .....	35 - 36
Palet : 2. Indik Pamidanda .....	36 - 38
SARGA : VII. NGUWAH NGUWUHIN AWIG-AWIG .....	38
SARGA : VIII. P A M U P U T .....	38 - 40

# MURDHA - CITTA

OM AWIGHNAMASTU NAMA BUDHA,

Mawit sangkaning asung kertha wara nugrahan Ida Sang Hyang Parana Wiswa, presida kasuratang Awig-Awig Desa Adat Kusamba, gunantinnia kedaserin antuk pasuara gilik saguluk saha kayun suci nirnala, ening lan tanpa teletah.

Awig-awig gunanti naka uger-uger penangi, pinaka bungkah panikukuh Desa Adat Kusamba, sajeroning midabdabin kalih nyanggra keukretan jagat mihak krana desa adatinia, tur kesungkemin antuk Dharma, prawetinnia ngerajegang Sang Hyang Aji Agana manut dresta.

Bewosan ring dresta inwcap panekas Pancasila lan Undang-Undang Dasar 1945 mihak sehananing uger-uger saha kawedarang bilih Sang Anangkurat taler lan kalengkapin antuk daging awig-awig puniki.

Mugi mawit kasidan nikolihang manut patitishia.

OM KBAMA BAMPURNA YA NAMA BUANA.

OM SHANTI, SHANTI, SHANTI OM.

----- \*\*\* -----

SARGA I

ARAN LAN WAWIDANGAN DESA

Pawos 1

- (1) Desa Adat puniki mawasta Desa Adat Kusamba.
- (2) Wawidangan Desa Adat puniki ngawengku :
  - a. Pura - pura :
    - Kahyangan Tiga lan Pura Segara,
    - Pamerajan, Paibon, Dadia;
  - b. Pekarangan Desa utawi tanah banjar lan telajakannya;
  - c. Tanah pekarangan paumahan, tegal miwah carik;
  - d. Margi lan rurung;
  - e. Tukad lan jelinjing;
  - f. Setra lan Tunon;
  - g. Tepining segara manut ring kawentenan dresta.
- (3) Wawidangan inucap ring ajeng mawates nyatur bhuwana sekadi ring sor puniki :
  - a. Wates sisi Lor : Subak Dawan lan Subak Gunaksa;
  - b. Wates sisi Wetan : Desa Adat Pancingan, Desa Adat Bias;
  - c. Wates sisi Kidul : Kampung Islam Kusamba, lan Segara Selat Badung;
  - d. Wates sisi Kulon : Desa Adat Pande, Desa Adat Pasurungan.
- (3) Desa Adat puniki ngawidangin asta Banjar luwire :
  - a. Banjar Batur;
  - b. Banjar Rame;
  - c. Banjar Tengah;
  - d. Banjar Presatria I;
  - e. Banjar Presatria II;
  - f. Banjar Bingin;
  - h. Banjar Agung;
  - i. Banjar Anyar.
- (4) Desa Adat puniki ngawidangin 2 (kalih) Tempek luwire :
  - a. Tempek Kawan : 4 Banjar;
    1. Banjar Batur;
    2. Banjar Rame;

3. Banjar Presatria I;
4. Banjar Presatria II.

b. Tempek Kangin : 4 Banjar:

1. Banjar Anyar;
2. Banjar Agung;
3. Banjar Bingin;
4. Banjar Tengah.

- (5) Wadidangan Desa Adat puniki kagenahin antuk Krama Desa Luwira :  
Krama Ngarep, Krama Mangele, Krama Balu kasinanggeh Krama Desa.

## SARGA II

### PETITIS LAN PAMIKUKUH

#### Pawos 2

Desa Adat puniki ngamanggehang pamikukuh Desa sekadi :

- a. Pancasila;
- b. Undang - Undang Dasar Republik Indonesia tahun 1945, miwah Peraturan-Peraturan Pemerintah Agung Republik Indonesia tan maren manggeh kainggilang, tan wenang kalempasin antuk daging awig-awig puniki;
- c. Tri Hita Karana manut tatwaning Agama Hindu.

#### Pawos 3

Petitisi Desa Adat puniki kamanggehang sekadi ring sor :

- a. Mikukuhin saha ngerajegang Sang Hyang Agama;
- b. Nginggilang tata prawerti magama;
- c. Ngerajegang sukertaning Desa, Krama saha Kasukertaning Pawongannya sekala lan niskala.

## SARGA III

### SUKRETA TATA PAKRAMAN

#### Palet 1

#### Indik - Krama

#### Pawos 4

- (1) Sane kabawos warga Desa Adat punika, sahanan jadma sane jumenek ring wawidangan Desa Adat lan sane jumenek ring dura Desa nanging gumanti wijiling Desa Adat Kusamba.
- (2) Warga Desa Adat inucap ring ajeng kagilih linggihnya dados kula soroh Luwira :

- a. Warga Desa Adat sane magama Hindu tur sampun munggah meca-  
cah jiwa, kasinanggeh warga Desa Adat:
- b. Sewosan ring punika kabawos tamiyu.

Pawos 5

Sane patut ngeranjing mekrama banjar utawi Desa inggih punika  
jadma sane sampun alaki-rabi, ngamong wiadin tan ngamong karang  
desa tur satinut ring sahananing daging awig-awig Desa Adat.

Pawos 6

- (1) Kula warga Desa sane megama Hindu sampun jumenek ring wawidangan  
Desa Adat wenang ngeranjing mekrama banjar dumun, tur patut  
ngeranjing mekrama Desa.
- (2) Yan wenten anak-anaking warga Desa Adat nilar desa ngantos 20  
(kalih dasa) warsa lawasnya, prade malih mawali tedun mekrama  
desa pemargine pateh kadi jadma duna desa sane wawu ngeranjing  
mekrama desa.

Pawos 7

- (1) Krama desa sane ketinggal lampus olih suami utawi istrinnyane,  
yan okane durung wenten sane munggah deha utawi truna kepatutang  
ngemargiang ayah balu, tur mawali ngeranjing mekrama marep sesam-  
pun okane deha utawi truna.
- (2) Krama desa sane ketinggal lampus olih suami utawi istrinnyane,  
tur sampun maduwe oka deha utawi truna kepatutang manggeh mekrama  
desa.
- (3) Sang sampun tedun mekrama raris wenten sinalih tunggil anaknya  
lanang sampun alaki-rabi, wenang sang anak nyundul ayah pakraman  
yayahnya, raris yayahnya kabawos nyada/unggu tur tan kari keni  
ayah-ayah desa pakraman.
- (4) Yan wenten jadma saking jabakuta utawi saking dura desa pacang  
ngeranjing mekrama, patut tedun mekrama banjar rihin, tur ngera-  
ris tedun mekrama desa, jadma inucap patut keni pamogpog gung  
artha 500, satenge ngeranjing ke banjar sane marep lan satenge  
ngeranjing ke Desa Adat.

Pawos 8

- (1) Yan wenten jadma megingsir mekrama banjar ke banjar sewosan  
sawidangan Desa Adat, sangkaning rahayu wiadin malarapan tan  
manut ring pematut banjarnya rihinan, wenang jadma punika mupu-  
tang rihin hutang piutang ring banjar sane katinggal, tur ring  
banjar sane katuju wenang katiwakin pamidanda gung artha 5.000,  
satenga ngeranjing ke banjar sane katuju lan satenga ngeranjing  
ke Desa Adat.
- (2) Yan jadma punika tan naur pamidanda kadi kocaping ajeng, prajuru  
Desa patut ngawentenang pedamiyak ring banjar-banjar sawidangan  
Desa Adat mangda tan nerima jatma punika ngeranjing mebanjar.

Pawos 9

- (1) Yan wenten krama desa matinggal sapekuren saking Desa Adat , sakewanten tan pasadok ring I Klian Banjar ngantos lintang ring tigang sasih, patut krama inucap kausanang mipil mekrama banjar wiadin Desa manut sulur kadi ring sor puniki :
  - a. Yan jadma punika maduwe hutang ring banjar wiadin ring Desa wenang hutang punika kaangganin antuk warisnyane, sakewanten yan wenten pusaka sane kagakel olih warisnya.
  - b. Prade warisnya tan sanggup naurin hutang jadma inucap, seantukan tan wenten barang pusaka, hutang punika manggeh kantung dados hutang sang matinggal, tur patut katawur ritatkala jadma punika mawali medesa adat saha kadulurin pemogpog manut Pawos 7 (pitu ) ring ajeng.
- (2) Krama Desa Adat sane usan mekrama yadiastu sangkaning rahayu utawi tan rahayu, tan kapatutang polih pah-pahan banjar utawi Desa.

Pawos 10

- (1) Yan wenten sinalih tunggil suami wiadin istrinya nilar desa mejalara ngerereh karya, sakewanten ring ilikita kantung munggah alaki-rabi, yadiastun patilarnyane makta surat keterangan maging-sir-saking Kepala Desa, wenang kantung keni seurah-arih pemargi manut sulur ring sor puniki :
  - a. Yan wenten suami matinggal, sang istri keni seurah-arih pemargin adat miwah patus, sakewanten seayah-ayah lanang tan keni.
  - b. Yan sang istri matilar, sang suami sane keni seurah-arih pemargin adat miwah patus nanging seayah-ayah istri tan keni.
- (2) Prade makekalih suami istri nilar desa, sakewanten kantung mipil ring Desa Adat, wenang kantung keni seurah-arih desa Adat, kemawon ayah-ayah tan keni.

Pawos 11

Indik Teruna ring Desa Adat Kapidabdabin sekadi ring sor :

- a. Behananing Warga desa sane sampun munggah teruna miwah deha, patut ngeranjing sekaa Teruna manut bebanjarannya sowang-sowang.
- b. Sekaa Teruna manut kewentenannyane patut nyarengin nyangra sepe-karyan krama banjar utawi Desa Adat manut pituduh saking Klian Banjar utawi Klian Desa Adat.

Pawos 12

- (1) Sahanan warga desa sane madruwe putra sampun mayusa 10 ( dasa ) oton, patut ngeranjingang putrannyane senistannyane puput ring Pendidikan Dasar.

- (2) Manut daging tatwa agama Hindu, sang sampun jangkep alaki-rabi, patut ngutsahayang putra sane kebawos Suputra, tur keaptiang mangda ugi ngemiletin Keluarga Berencana.

Pawos 13

- (1) Yan wenten jadma sane megama Hindu madunungan sapekuren sangkaning ngerereh karya, jantos mesuwe 42 (petang dasa kalih) rahina, Klian Banjar sane ngawidangin patut negdeg sang madedunung mangda tedun mekrama Banjar lan mekrama Desa Adat.
- (2) Prade sang madedunung tan nganutin tedun mekrama, I Klian Banjar patut miteketang mangda sang madedunung kesah saking wewidangan Desa Adat manut sulur.
- (3) Yaning medunungan sapekuren sangkaning ngingsirang anak sakit ngerereh tamba, yadiastun lintangan ring 6 (nem) sasih kadadosang tan tedun mekrama desa.
- (4) Yan sang madunungan mawiwit antuk ngemargiang tugas Pemerintah ring wawidangan Desa/Prebekelan kapatutang mangde tedun mekrama desa Dinas kemawon.

Pawos 14

- (1) Behanan warga bebanjaran kasinanggeh kerama patus, patut keni ayah-ayah krama patus luwire :
- a. Patus marep ; inggih punika sane sampun mejangkepan alaki-rabi patut keni ayah-ayah patus miwah patus ajengan;
  - b. Patus Balu ; inggih punika krama sane katinggal lampus olih suami utawi istrinya, tan keni ayah-ayah patus, nanging patus matah patut keni.
- (2) Krama patus sane pacang ngaben utawi melebonang tan kalugra ngencak patus miwah ngeladin krama patus.

Pawos 15

- (1) Rikalaning kerama patus pacang ngaben utawi melebonang pemergi nuduk patus karya wantah ping tiga luire :
- a. Rikala mekarya rerompok miwah bale bumi/tatakan petulangan;
  - b. Nangiang utawi ngebet layon;
  - c. Ngerembat wadah wiadin pemereman, saang rikalaning rahina padewasaan saha nyarengin nganyut ka Segara.
- (2) Kerama patus keni wedal-wedalan merupa kelangsah akuwub, papah jaka apapah miwah reramon mekarya rerompok.

Pawos 16

Sane kebawos pemergi patus ayu luwire rikalaning ngemargiang : Dewa Yadnya, Resi Yadnya, Pitra Yadnya ( ngerorasin ) lan Manusa Yadnya.

- (1) Yan wenten ikrama patus madruwe karya kadi inucap ring ajeng, tur sang madruwe karya meserah penampahnya kebanjar dados nuduk patus.
- (2) Yan sang maduwe karya tan maserah penampahnya kebanjar tan kepautang nuduk patus.

Pawos 17

- (1) Ritatkala Desa Adat mapewangun utawi mecikang wewangunan kawentenang pah-pahan karya olih Klian Desa mantuka ring bebanjaran, prade wenten sane nyedokin patut keni pamidanda manut sulur luwire :
  - a. Yan wenten bebanjaran tan muputang karya kadi arah-arah sangkaning kateleman I Klian Banjar, wenang I Klian Banjar keni danda gung artha : 50;
  - b. Yan prade isinoman (saya) lipia ngemargiang arah-arah marep ring ikrama Banjar, patut I Sinoman keni danda gung artha : 50;
  - c. Yan babanjaran sane teleman wenang bebanjaranne katiwakin pamidanda gung artha : 100 tur ke tawurip antuk Banjar;
  - d. Sapunika taler yan I Sinoman wenten ngecagang arah-arah ring sinalih tunggil krame Banjar, patut I Sinoman melelenin naur denda sang kekecagang gung artha : 25;
  - e. Yan I Sinoman iwang ngemargiang arah-arah marep ring i krama Banjar, wasty i krama tan rawuh mekarya, wenang i sinoman keni danda gung artha : 25;
  - f. Yan I Krama Banjar tan rawuh mekarya kadi arah-arah I Sinoman, wenang Krama inucap keni danda gung artha : 25.
- (2) Sapunika taler yan wenten krame tan tinut wiadin tuwom ngamedalang wedal-wedalan reramon utawi sane siwosan, wenang keni danda, tur patut ketawur ngawilangin pengargan reramon inucap.

Pawos 18

- (1) Yan wenten krama kasudi olih Banjar utawi Desa Adat tan wenang nulak tanpa krana, sang mamurug wenang katiwakin pamidanda gung artha : 50.
- (2) Sakewanten yan sangkaning jati wenten wiwitan sekadi sakit tahunan, utawi jumenek ring dura desa, dados nulak sasudian.

Pawos 19

- (1) Sane polih leluputan ayah miwah wedal-wedalan saking desa inggih punika sang inggiling linggih wiadin sang patut kawelas asihin :
  - a. Sane kebawos inggiling linggih inggih punika; Ida Pedanda miwah pemangku desa;

b. Sang patut kewelas asihin inggih punika; jadm sakit tahunan, cedangga miwah jadm nistaning miskin manut pangelokikaning prajuru desa.

- (2) Krama Banjar utawi Desa yan sampun mayusa 70 warsa tur tan wenten sane nyundul ngayahang, yadiastu mekanten kantun meresidayang mekarya, wenang polih luput se ayah-ayah, wedal-wedalan reramonn miwah paturunan jinah.
- (3) Prejuru Desa, Klian Banjar, Pecalang miwah para Sinoman, polih luput wedal-wedalan reramon miwah piturunan jinah separiindik prebeapacang ngaturang upacara yadnya ring Desa Adat.

#### Pawos 20

Sahananing ayah-ayah karya ring desa dados kapelaga antuk I Krama yan mulajati sangkaning swadharmannya ngawinang krama inucap tan sida ngaturang ayah-ayah manut pemargin pengayah kerama sewosan, turmaning sampun polih pemutus saking pematut desa.

#### Pawos 21

Yan wenten krama memandal dedaunan saking prajuru banjar utawi desa ngantos ping tiga tan pesadok wenang sang cedok keni pamidanda gung artha : 50.

#### Pawos 22

- (1) Sane patut katitenin sehanan pemargine sane kasinanggeh duskreta miwah ngaletihin desa :
  - a. Salah timpal : Jadm masenggama sareng sato;
  - b. Gamia gamana : Masanggama ring piyanak, ibu, nyama, rerama dianyama, ponakan dianyama miwah cucu dia - nyama.
- (2) Yan wenten katumonang utawi kabuktiang jadm melaksana sekadi kecap ring ajeng, wenang jadm inucap keni pamidanda gung artha : 2.000, saha kedulurin pemahayu pengupakara ring desa pekraman.

#### Palet 2

#### Indik - Prajuru

#### Pawos 23

- (1) Desa Adat kaenterang antuk prajuru adat maka pamucuk Bendesa.
- (2) Sane kebawos Prajuru Adat luwire :
  - a. Bendesa Adat;
  - b. Penyarikan;
  - c. Patengen;
  - d. Klian-klian Tempek;
  - e. Klian-klian Banjar.

- (3) Krama banjar kaenterang olih Klian Banjar.
- (4) Baguat pacang ngadegang Prajuru Adat patut majalaran sekadi ring sor puniki :
  - a. Sampun alaki-rabi utawi krama marep;
  - b. Sane kebawos ring ayat (2) aksara a, b lan c, mawit saking gilik perarem prajuru Adat;
  - c. Sane kebawos ring ayat (2) aksara d mawit saking gilik perarem tempekan;
  - d. Sane kebawos ring ayat (2) aksara e mawit saking gilik perarem krama Banjar.
- (5) Wewanengan sengker dados Prajuru Adat, mawaneng 5 (limang) warsa.
- (6) Prajuru Desa Adat sane sampun tutug waneng swadarmannyane kangkat malih kasudi pinaka Prajuru Adat manut sulur.

Pawos 24

Swadharmaning Bendesa Adat, Prajuru Adat lan Klian Banjar luire :

- a. Ngenterang paruman desa utawi banjar;
- b. Ngenterang pemargin sedaging awig-awig miwah pamutus-pamutus nyane;
- c. Nuntun tur ngenterang krama rauhing warga desa sane ngupadi kesukertaning sekala lan niskala luire nginggilang : Kesukertan Agama, Kesucian Kahyangan, Kesucian Pawongan, kesucian Palembang muwah tata titi carane ngangge setra/tunon;
- d. Nuntun utawi ngenterang tatane ngangge saraja berana druwen desa utawi Banjar;
- e. Mawosin miwah niwakang pemutus marep ring kawentenan wicaran warga desa;
- f. Pinaka Duta, Desa utawi Banjar rikala matemuang bawos marep ring sang sapasira ugi.

Pawos 25

- (1) Swadharma miwah parilaksana ring ajeng tan maren patut manut ring daging awig-awig, miwah pamutus-pamutus perareman desa utawi Banjar.
- (2) Swadharmaning Prajuru Desa wenang nibakang ; pemedanda, dedosan ring warga desa manut pangelokika.
- (3) Bendesa Adat utawi Klian Banjar ngemargiang pamutus paruman desa utawi Banjar nganinin parilaksana swadharmanya sowang-sowang.
- (4) Bendesa Adat ngawentenang paruman Prajuru manut kawentenan; Daging paruman manut kadi daging awig-awig luwire :
  - a. Ngarincikang penyacahing sedaging awig-awig sane mabuat;

b. Tata titi ngemargiang sedaging awig-awig;

c. Sahanan indik sewosan anggen nyangkepin awig-awig mangda manut ring : Adat, Agama, Sastra, Purana, Loka miwah Dres-ta.

(5) Parilaksana ring ajeng patut kadamiakang ring paruman Banjar utawi Desa.

(6) Daging pamutus paruman Prajuru Desa pariindik pacang mapawangun wangunan desa luire :

a. Sahananing pengayum utawi mecikang pawangunan patut nganutin pamutus paruman Prajuru Desa;

b. Yan pacang mapewangun ngawit utawi ngentosin pawangunan patut nganutin pamutus paruman Krama Banjar sowang-sowang.

### Palet 3

#### Indik - Kulkul

#### Pawos 26

(1) Indik kawentenan kulkul sawawengkon wawidangan Desa Adat kapalih-palih sekadi ring sor puniki :

a. Kulkul Desa Adat;

b. Kulkul Banjar-banjar Adat;

c. Kulkul ring Pura-pura;

d. Kulkul ring sowang-sowang paumahan.

(2) Suaran kulkul inucap punika kasinanggeh suaraning desa utawi banjar, satmaka atur piuning ring krama desa utawi krama banjar.

(3) Pemargine sane patut kacihnayang antuk suaran kulkul luwire :

a. Kulkul Pura patut kasuarayang rikalaning Ida Bhatara tedun mehias rauhing ngaturang piodalan utawi rikala nyineb;

b. Kulkul desa utawi banjar patut kasuarayang ritatkala pacang parum/sangkep, makarya lan sane siosan;

c. Yan indik pawiwahan kasuarayang kulkul banjar;

d. Yaning wenten kelampusan patut nyuarayang kulkul banjar;

e. Kulkul ring sowang-sowang paumahan kasuarayang ritatkala wenten keni Kapancabaya.

#### Pawos 27

(1) Sane patut nyuarayang kulkul rikalaning krama pacang parum/sangkep, makarya, ngerorod wantah klian utawi pakon klian. Yan wenten jadma mamurug wenang katiwakin pamidanda sekadi ring sor :

a. Yan kulkul banjar keni danda gung artha : 50;

b. Yan kulkul desa keni danda gung artha : 100.

- (2) Risedek desa katiban pancabaya sehananing warga desa utawi banjar dados nyuarayang kulkul saha masuara bulus.
- (3) Rikala wenten suaran kulkul bulus, sehananing warga desa patut tedun matetulang.

#### Pawos 28

Indik tatepakan kulkul manut kawentenan luire :

- (1) Suaran kulkul sangkep/parum, tedun makarya suarane kalih tuludan sedeng.
- (2) Suaran kulkul ngerorod utawi merangkat suaranyane tigang kelentungan. Prade suaran kulkul ring ajeng lintang utawi kirang ring tigang kelentungan, wenang sang nyuarayang keni pamidanda gung artha : 25.
- (3) Ritatkala wenten kelampusan suaran kulkul kalih tuludan alon.
- (4) Ritatkala wenten kapancabaya suaranyane atuludan bulus.
- (5) Yan indik wenten amuk, yudha, rampok, kemalingan suaranyane kalih tuludan bulus. Yan risampune sang magawe sekadi ring ajeng kakeniang suaran kulkul tigang kelentungan pang tiga.
- (6) Suaran kulkul ring sowang-sowang paumahan manut piteket guru-wisesa.

#### Palet 4

Indik Paruman utawi Sangkep

#### Pawos 29

- (1) Paruman krama Desa Adat kemargiang ngamasa sapisan rikalaning Ida Batara Kantun Ngadeg/Nyejer Rahina Pengusabaan ring Pura Segara.
- (2) Sangkepan Krama Banjar kemargiang ngesasih nemonin rahina Budha Kliwon.
- (3) Ritatkala parum/sangkep patut naur gibungan dedosan, pamidanda, naur pianak jinah keputran, indik dedamiyakan, indik pawedal-wedalan miwah sane sewosan.
- (4) Prade I Krama tan naur sekadi inucap ring ajeng manut kewentenan-  
nia, krama inucap keni panikel, nanging dados ketaur malih asasih rikalaning pacang tedun parum/sangkep.
- (5) Yan wenten sinalih tunggil Ikrama Banjar utawi Desa sane jumenek ring wewengkon Desa tan nahenin tedun sangkep tanpa krana, ngantos ping tigang sangkepan, wenang krama inucap keni pimidanda gung artha 200, tur kawewehin dedosan sangkepan ping tiga.

Sangkepan utawi paruman Desa Adat lan Banjar sowang-sowang patut kerahin antuk krama Desa utawi Banjar manut sekadi ring sor puniki :

- a. Melarapan antuk suaran Kulkul;
- b. Paruman/sangkepan presida kelaksanayang yan sampun ketedunin antuk krama satenga langkung saking krama sane patut tedun;
- c. Krama Desa utawi krama Banjar rikalaning pacang tedun sangkep / parum patut ngangge busana adat;
- d. Tan maren ngastiti ring Begawan Penyarikan, maka serana antuk banten cane lan reruntutannia;
- e. Pamutus paruman utawi bebawose mangda majalaran gilik saguluk manut panepas pematut sane dados keanggen sareng sami, teler mangda anut tur tan lempas ring pematut Guru Wisesa;
- f. Yan prada wenten paksa tungkas, punika patut keputus antuk pasua-ra manut perarem;
- g. Pamutus paruman punika sane patut kesungkemin antuk krama Desa lan Banjaran sami, tur sane wenang keanggen uger-uger pamitegep daging awig-awig, maka gaguat tata pangenter ring Desa Adat lan Banjar manut dresta;
- h. Sakewanten yan tan preside memangguh pamutus, patut wicara punika katur ring guru wisesa sane patut niwakang pamutus manut daging wicaran;

sampun wus peparuman tur pemutus bebawos sampun kesungkemin antuk ikrama, tan kalugra ikrama ngerabrab malih daging peparuman. Yan wenten asapunika patut keni pamidanda gung artha : 250.

Falet 5

Indik Druwen Desa

Pawos 31

- (1) Sane kasinanggeh druwen Desa Adat, sekadi ring sor puniki :
  - a. Pura Dalem, madruwe laba carik bit sibak magenah ring subak Kusamba, Sp. 22, Klas. I, linggah 1250 M2;
  - b. Pura Puseh, madruwe laba carik bit tenah magenah ring Subak Kusamba, Sp. 48, Klas II, linggah 2200 M2;
  - c. Pura Segara, madruwe laba tegal, magenah ring Desa Kusamba, Sp. 58, Klas V, linggah 7500 M2 lan 2310 M2.
- (2) Tanah pelinggih Pura Dalem, Puseh, Bale Agung lan Pura Segara muwah palemahannia utawi telajakannia.
- (3) Tanah lan wewangunan druwen Desa miwah druwen Banjar.

- (4) Tanah pekarangan banjar miwah tanah pekarangan desa miwah telajakannia sane tan mapipil.
- (5) Margi lan rurung sawawengkon wawidangan Desa Adat.
- (6) Tanah Setra, tanah tunon, tanah monggalan, Prajapati sane kesanggra antuk Desa Adat.

Pawos 32

Olih-olihan Desa Adat sekadi ring sor puniki :

- a. Saking upon-upon druwen desa;
- b. Saking paturunan krama desa adat;
- c. LPD ( Lembaga Perkreditan Desa );
- d. Saking ngawentenang ilen-ilen lan dana punia;
- e. Saking paican Guru Wisesa.

Pawos 33

- (1) Krama sane pacang mendem sawa, patut masadok dumun ring Klian Banjar, raris I Klian Banjar nyuarayang kulkul maka piuning ring krama Banjar, saha krama Banjar patut nyarengin kesetra utawi tunon. Yan cedok tan rauh nyarengin ke setra/tunon, patut keni dedosan manut perarem sowang-sowang.
- 2) Pecak warga desa sampun ninggal desa saking suwe, prada rauh sapekuren sami nanging durung tedun mekrama, raris lampus. Klian Banjar tan wenang ngewehin suaran kulkul lan nedunang krama Banjar. Sang ngeraksa patut mendem kesetra monggalan, saha jadma punika keni panukon setra/tunon gung artha : 100, jinahnya ngeranjing ke Banjar satenge lan ke Desa satenge.
- 3) Prade wit sawane sane pacang kapendem boya saking warga Banjar utawi Desa, Klian tan ngewihin suaran kulkul. Sang ngeraksa kangkat mendem ring setra monggalan, sakewanten keni panukon setra gung artha : 200, jinahnyane ngeranjing ke Desa.
- 4) Yan wenten anak madunungan mawiwit ngrereh karya, durung mecacah jiwa ring Banjar utawi ring Desa, prade jadma punika lampus, sang ngeraksa patut mendem ring setra monggalan tur keni panukon setra gung artha : 200, jinahnyane ngeranjing ke Desa.
- 5) Yan wenten jadma saking dura desa lampus ring wawidangan Desa Adat tur tan wenten ngilingin sawania, wenang prajuru Desa digelis mapiuning ring Guru Wisesa. Risampun katureksain sawa punika kangkat kapendem ring setra Monggalan. Pemerayascita kesanggra olih Desa Adat.
- 6) Risampun sawane kependem raris wenten ngilingin, sang ngilingin keni pangupakara pemerayascita ring kahyangan Desa.
- 7) Yan wenten jadma sewos Desa Adat pacang ngamiletin utawi ngiring ngaben/melebonang ring wawidangan Desa Adat, Sang ngiring ngaben/melebonang keni penanjung batu manut pangambilan pengabenan/pelebon luwire :

- a. Sawa preteka keni penanjung batu gung artha : 50;
- b. Swasta preteka keni penanjung batu gung artha : 25.

Pawos 34

- (1) Manut dresta tan wenang mendem, ngeseng sawa/layon rikala rahina Pasah ngawit saking semeng ngantos tengah wengi. Yan wenten mamurug keni pamidanda gung artha : 200, jinahnya ngeranjing ke Desa.
- (2) Sewosan ring Ida Pedanda/Sulinggih, tan kalugra mendem utawi atiwa-tiwa sewosan ring setra utawi tunon. Yan wenten mamurug keni pamidanda gung artha : 400, jinahnya ngeranjing ke Desa.
- (3) Mendem Sawa utawi layon tan kalugra ngajangin.

Pawos 35

- (1) Yan wenten jadma ngangon utawi negulang banteng, kuda, kebo lan kambing ring setra utawi tunon wenang sang ngangon utawi negulang keni pamidanda gung artha luwire :
  - a. Banteng, kuda lan kebo : 200 aukud;
  - b. Kambing : 100 aukud.
- (2) Tan wenang ring wewidangan setra utawi tunon keanggen genah sewosan mitra yadnya.
- (3) Tan kalugra mendem utawi ngeseng sawa sewosan ring sang me Agama Hindu ring setra utawi tunon Desa Adat.
- (4) Bendesa Adat patut nitenin keasrian utawi keresikan setra utawi tunon.

Pawos 36

- (1) Yan wenten kulawarga Desa Adat kebuktayang melaksana ; memandung, ngalinyokin, ngrusak wewangunan muwah sahananing druwen desa, sang melaksana keni denda gung artha 250, tur barang-barang sane kepandung patut mewali ke desa saha taler mecikang sane rusak tur ngupakara sepatutnia.
- (2) Yan wenten kulawarga Desa Adat kabuktayang nunjel pawangunan druwen desa wenang jadma punika keni pamidanda manut perarem Desa, saha meselangin pawangunan sane rusak tur ngupakara sepatutnia.
- (3) Yan wenten warga Desa Adat ngaletihin ring desa luwire ; nasang-gama ring pura-pura wenang sang melaksana keni pamidanda gung artha 250, saha sang melaksana patut ngupakara prayascita pura inucap.

Palet 6

Sukreta - Pamitegep

Kaping 1

Karang, Tegal lan Carik

Pawos 37

- (1) Tanah pekarangan desa utawi tanah paumahan, mepipil yadian tan mepipil patut keayahang mekrama Desa Adat Kusamba, sejawaning jadma punika sampun tedun mekrama desa adat ring sawengkon Pre-bekelan Desa Kusamba.
- (2) Yan wenten sinalih tunggil krama Desa Adat pacang matimbang utawi nyiwadanaang tanah pekarangan desa sane tan mepipil ( tan keni tigasane ) patut polih wak-wakan saking warisnia taler polih pamutus olih Prajuru Desa Adat.
- (3) Sehanan wewilangan karang, tegal lan carik sane wenten ring wewidangan Desa Adat Kusamba, patut kewatesin antuk tembok, pagehan miwah pal saking kantor Pertanahan, tur kesaksiang antuk Prajuru Adat. Wates sisi kaler miwah kangin taler sane namping rurung patut kekaryanin olih sang medruwe karang mangda makanten asri.
- (4) Pamedal kerurung utawi kemargine tan wenang kebebeng, taler mangda kewehin sang embah utawi penguwas toya. Penguwas toya punika kepatutang kepelemahan sane pandapan sakewanten mangda kepiara olih sang nganggen, mangdene tan ngerahuang pikobet ring anak sewos.

Pawos 38

- (1) Krama Desa Adat tan kelugra ngelah-lahang tanah pekarangan Desa, tegal lan carik druwen anak sewos, napimalih sane kadruwe antuk Desa Adat sekadi ; Kahyangan, Setra/tunon, Banjar, margi utawi rurung miwah sane sewosan.
- (2) Prada wenten sekadi ring ajeng, sang ngelah-lahang wenang ngewal-ang tanah inucap saha keni pamidanda manut perarem, tur kewewehin pengupakara yening ngalahang genah-genah sane kasinanggeh suci.
- (3) Yan wenten jadma sane medruwe karang paumahan ring wewidangan Desa Adat Kusamba, sakewanten nenten nyarengin mekrama Desa Adat, seantukan jadma punika sampun tedun mekrama desa ring desa adat siwosan, kepatutang sang medruwe karang paumahan inucap keni sekadi ring sor :
  - a. Pamahayu jagat manut kadi daging perarem;
  - b. Ayah ritatkala nyanggra pekaryan Guru Wisesa.
- (4) Behananing karang, tegal, lan carik patut mangden kawigunayang marep ring sang neruwenang, taler tan ngawenang keduhkitan anak sewos.

- (1) Yening wenten sinalih tunggil krama desa pacang nandur tanem tuwuh nampek ring genah Prahyanan miwah paumahan, peembang ipun saking penyengker ngetengahang pinih kedik adepa agung (2 meter).
- (2) Yan wenten kekayonan kepitahen carang lan daun ipun ngelintangin Prahyanan utawi paumahan anak sewos lan rurung utawi margi wenang kesepat gantungin, tur carang lan daun ipun keenteb antuk sang neruwenang. Yan mamurug patut keni pamidanda manut perarem.
- (3) Kekayonan sane kapitahen pacang ngerahuang baya ring anak sewos, mekadi ; ngungkulin, akah ipun ngerusak tembok penyengker utawi tembok wewangunan, kekayon punika kangkat ketundung.
- (4) Pemargine nyepat gantung minekadi nundung mangda ngalaksanayang sekadi ring sor puniki :
  - a. Sang jaga nyepat gantung utawi nundung pinih ajeng mangda ngawentenang bebawos ring sang medruwe kekayonan punika;
  - b. Yening sang madruwe kekayonan punika tan ngewehin pacang nyepat gantung utawi nundung, wenang sang ngewara mesadok tur nunas pematut ring Prajuru Desa;
  - c. Yan sampun kewehin manut pidabdab prajuru desa, pemargine mangda sekadi ring sor puniki :
    1. Petitis sekala lan niskala malarapan mekarya perantos lan upacara wewantenan sepatutnya.
    2. Kesarengin olih sang madruwe kekayonan.
    3. Kesaksiang antuk Prajuru Desa.
  - d. Prebiya nyepat gantung utawi nundung ketawur olih sang ngewara, wangke wit, carang, daun lan buahnyane keserahang ring sang madruwe pepayonan punika.
- (5) Prade risampune kebawosin olih prajuru adat taler tan kewehin, wekasan yan kekayonan punika ngerauhang : mis, kekotoran miwah ngerubuhin sang ngwara, kepatutang sang medruwe kekayonan punika, mersihang, mecikang tur ngupakara wewangunan sane karubuhin.
- (6) Prada sampun ngemargiang upakara banten lan sampun tragia perantos, kesarengin olih sang madruwe kekayonan tur kesaksiang antuk Prajuru, risampune kelaksanayang raris ngerubuhin wewangunan anak sewos, sane kepatutang ngamedalang prebiya lan pengupakara sareng tiga, inggih punika sang nundung, sang melaksana ngebah lan sang medruwe kekayonan punika.
- (7) Sakewanten yan wenten anak ngebah taru nenten ngemargiang sekadi inucp ring ajeng, yan pekaryane ngerauhang baya ring wewangunan anak sewos, sane kepatutang ngamedalang prebiya lan pengupakara sang ngerubuhin.

- (8) Yan wenten taru kepungkatang ke tegalan utawi carik anak sewosan, prada ngerusak tetanduran, pepagehan tegal utawi carik sane keungsi, wenang sang madruwe tarune sane pungkak punika keni penebus gung ipun manut kadi pengelokika Prajuru Desa.
- (9) Yan wit taru utawi kelapa pungkak tanpa krana, sehanan woh utawi carang sane palas ring witnya punika dados keambil, sakewanten witnya tan dados keambil.
- (10) Yan wenten tetanduran entikan ipun ngelimbak utawi ngelintang kepekarangan, tegal lan carik anak sewos, wenang ketaban olih sang madruwe karang, tegal lan carik sane keungsi olih entikan punika.
- (11) Prada wenten parebat indik wates tegal sangkaning wenten tetaruan ring tengahing sepat wates, punika wenten pengelokikan pematut desa luwira :
- Yan wit taru kari alit durung mawoh, wit taru tumbuhye saking entik-entikan, wenang kerabas lan wit tarune dados kalih;
  - Yan wit taru sampun mawoh wenten sane muponin saking suwe, punika patut kerabas, wit taru punika katiba ring sang muponin;
  - Yan wit taru wenten sane nandur sang nandur patut ngeniyang wit tarune.
- (12) Prada wenten taru nampek ring pekarangan utawi paumahan nanging-nenten katundung seantukan pekahtenanne wenten pacang ngerawuhang baya, raris pungkak tur ngarubuhin pekarangan utawi paumahan anak sewos, sang madruwe taru punika tan kangkat keni prebaya, sakewanten tarune sane ngelintang wenang ketaban olih sang katetahan ( baya tan wenang wilangin ).
- (13) Krama desa adat kepatutang mangda nyangra kewerdian tanem tuwuh sane ngawinang desane asri tur resik.

Kaping 3

Wewangunan

Pawos 40

- (1) Sapasira ugi krama desa sane pacang ngewangun tan kepatutang nyapcabin utawi nyayubin, napimalih toyan ipune nyabcabin kepekarangan utawi paumahan anak sewos lan rurung.
- (2) Yening pacang ngewangun merupa wewangunan adat ring Desa Pakraman, mangda ngangge sukat kadi dresta ( asta bumi, asta kosala kosali miwah sukat sewosan ) manut petitis sekala lan niskala.
- (3) Yening pacang sekarya rurung, linggah ipun pinih malit adepa agung ( 2 ) meter tur melarepan entuk paiguman olih sang pacang sekarya rurung ring sang madruwe tanah sane keanggan rurung.
- (4) Yan pacang ngenahang barang padruwan ring margine utawi rurung tan kedadosang kantong tan wenten galah memangi tur lain ipun wentah arahine, yan memurug keni pesidende gung artha : 50.

- (5) Sahanan margi utawi rurung sane wenten ring wewidangan Desa Adat patut kepiara keasriannya olih krama Banjar utawi Desa.
- (6) Tan wenang ngewangun sejeroning margi utawi rurung lan telajakan.
- (7) Warga desa adat mangda nyanggra keasrian Desa Pakraman, tan kedadosang ngentungang/ngutang luhu utawi kekotoran ring jelinjing, telabah, rurung lan margi, kaping ajeng ring genah genahe sane kasinanggeh suci. Yan mamurug kecaping ajeng patut keni pamidanda manut perarem.

#### Kaping 4

#### Wewalungan

#### Pawos 41

- (1) Sehanan warga Desa Adat Kusamba sane miara wewalungan, mangda sayaga nitenin wewalungannia upami : Negul, ngelogor, malengbeng mangdene tan ngrusak karang, tegal utawi pabianan lan carik krama sewosan, napi malih kantos ngeletehin kahyangan.
- (2) Sehanan wewalungan sane malubar kalih ngerusakang pekarangan utawi pabianan/carik tur ngawinang kepocolan anak sewos, patut wewalungan punika ketaban tur kesadokang ring Prajuru. Prajuru wenang niwakang denda ring sang nerebenang, tur kepatutang nawur penebus karusakan gung artha manut pengelokika.
- (3) Sane patut ketaban manut awig-awig puniki sehanan wewalungan suku pat. Pemidanda inucap manut munjuk lungsur sekadi ring sor.
  - a. Ingon-ingon sekadi : bawi, bangkung, kucit sampun mabelas menyonyo keni panebus penaban gung artha 20 aukud;
  - b. Yan bangkung kari ngajak pianak durung mabelas menyonyo, piyanak nyane tan keni ketaban;
  - c. Banteng, kuda, kebo keni panebus penaban gung artha 50 aukud;
  - d. Kambing keni panebus penaban gung artha 20 aukud;
  - e. Yan godel sampun ames neda diyastu durung matelusuk, wenang keni penaban gung artha 50 aukud.
- (4) Yan ngeletehin genah suci risampune keparitetes olih prajuru sang nerebenang patut keni danda, lan prebiyan sane karusak tur maweweh pangupakara genah suci manut kadi linging Agama.
- (5) Sang miara wewalungan tan kawenang ; ngalubar, negulang utawi ngangonang wewalungan ipun ring genah-genah kadi ring sor :
  - a. Genah-genah suci rawuh pekarangan Banjar utawi Bale Desa Adat;
  - b. Margi agung, rurung ring wewidangan desa adat;
  - c. Pekarangan Desa lan telajakannia;
  - d. Setra utawi tunon.

- (6) Manut pidabdab Guru Wisesa, krama desa adat patut nyanggra kawerdian wewalungan miwah sarwa prani.

Kaping 5

Baya lan Dusta

Pawos 42

- (1) Sehanan laksana tan rahayu sane ngawinang pekobet ring anak sewos kasinanggeh baya.
- (2) Sane kasinanggeh baya utawi panca baya luwire :
- a. Jiwa baya : kaamuk, kabaak;
  - b. Artha baya : kemalingan;
  - c. Raga baya : kapelegandang/kepaksa;
  - d. Geni baya : puun, linus;
  - e. Toya baya : blabar gentuh;
  - f. Dura cora ring Agama.

Pawos 43

- (1) Sapa sira ugi warga desa sane uning ring jadma sane pacang melaksana tan rahayu utawi warga desa sane katiban baya, mangda digelis matur supeksa ring Prajuru adat utawi Guru Wisesa.
- (2) Prade sinalih tunggil warga desa ketiban baya agung, sang ketiban baya utawi sang amangguh baya inucap, wenang digelis nyuaraang kulkul tur matur supeksa ring Prajuru utawi ring Guru Wisesa.
- (3) Sehanan warga Banjar utawi warga desa patut mapitulung sane kacihnayang antuk suaran kulkul, saha makta gegawan utawi piranti manut sekadi kewentenan baya inucap, mangdane sang keni baya sida digelis polih ketulungan.

Pawos 44

- (1) Yan pacang maseserep utawi ngeledahin ritatkala kapandangan, kapelegandang utawi ngicalang raga, pemargine sejeroning wawidangan Desa Adat, patut nunas penguak ring Prajuru tur mangda nyaringin maseserep.
- (2) Maseserep ring sewos bebanjaran utawi sewos desa adat, patut polih penguwak olih sang ngawiwenang banjar utawi desa adat inucap.
- (3) Tata cara maseserep mangda ketuntun olih Prajuru manut sekadi daging awig-awig.

- (1) Sehanan jadma melaksana tan rahayu sane ngawinang baya ring anak sewos, patut keni pamindanda manut perarem, tur katur ring Guru Wisesa.
- (2) Prade sane karusak utawi sane kepondung artha sane kasinanggeh suci, sewos ring keni pamidanda manut perarem, kepatutang taler keni penyangaskara caru, pemerasyascita muah sane sewosan manut kadi linging agama tur katur ring Guru Wisesa.
- (3) Yan sang melaksana tan rahayu mawit saking dura desa, prada keni kaejuk patut ketaban raris keaturang ring Guru Wisesa.
- (4) Prade wenten warga desa ngerereh reramon daun, buah lan carang sane kadruwe sowang-sowang utawi sane kadruwe antuk desa adat, sedurunge ngarereh mangda mesadok riyin ring sang neruwenang utawi Prajuru adat, yan tan mesadok sekadi inucap ring ajeng prada kacunduk olih sang madruwe, wenang kedanda manut perarem.
- (5) Yening mepengarah kepekubon utawi kepaumahan mangdene tan katuwekang rikala sang medruwe pakubon utawi peumahan kaicalan barang, pemaingine mepengarah mangda sekadi ring sor puniki :
  - a. Sadurunge ngeranjing kapekubon utawi kepaumahan mangda ngewentenang tetengeran suara ( mekaukan );
  - b. Yan tan kesaurin olih sang meduwe pekubon utawi paumahan, pemedale patut kedagingin sawen.
- (6) Yan wenten jadma nguman-nguman minekadi wak parusia, wak cepala, kroda, mayuda ring sangkepan, ring pura, patut keni pamidanda manut kadi perarem tur meweweh pengupakara manut kadi genah.

Kaping 6

Penyanggran - Banjar

Pawos 46

- (1) Yan wenten sinalih tunggil krama Desa Adat pacang ngawentenang yadnya merupa yadnya ala utawi ayu, patut kesanggra olih I Krama Banjar marep utawi krama desa manut pinunas sang meyadnya.
- (2) Yening yadnyane punika merupa karya ala luwire kelampusan, seda krama banjar marep patut ngrombo sang keni kelayusekaran manut kadi perarem utawi manut dresta sane sampun memargi.
- (3) Prada yadnyane punika merupa Pitra yadnya : Ngaben utawi pelebon, sang meyadnya kedadosanig nunas karya ring krama banjar marep utawi krama desa adat manut sekadi pinunas, sakewanten wantah pang tiga.
- (4) Rikala krama Banjar utawi krama Desa mapitulung ring sang madruwe karya, penyanggrane saha sidan.
- (5) Indik pemedalan patus, manut sekadi dresta sane sampun memargi tur kesungkemin olih krama banjar utawi krama Desa.

SARGA IV  
SUKRETA TATA AGAMA.

Palet 1

Dewa - Yadnya

Pawos 47

Pura-pura sane wenten tur kaempon olih krama Desa Adat Kusamba miwah kawentenan pujawalinnia sekadi ring sor puniki :

1. Pura Kahyangan Tiga :

a. Pura Puseh : Pujawalinnia ring rahine Buda Cemeng wuku Ukir, Ida Bhatara ngadeg tigang rahina, raris masineb;

b. Pura Dalem : Pujawalinnia ring rahine Saniscara Kliwon wuku Wayang ( Tumpek Wayang ); Ida Bhatara ngadeg tigang rahina raris masineb.

c. Pura Bale Agung : Pujawalinnia sinarengan ring Pura Puseh.

2. Pura Dalem Rajapati : Pujawalinnia sinarengan ring Pura Dalem.

3. Pura Segara :

a. Pujawalinnia ring rahina anggara kliwon wuku Medangsia (Anggar Kasih Medangsia) Ida Bhatara ngadeg tigang rahina raris masineb.

b. Pengusabaan satunggil rahina Purnama sasih Kelima, Ida Bhatara ngadeg solas rahina, raris masineb.

(4) Ring sowang-sowang Pura Desa Adat ring ajeng wenang ngadegang pemangku sane pacang ngenterang utawi nuntun sehananing yadnya utawi pengastawa ring pura-pura inucap.

(5) Ritatkala wali/piodalan ring Kahyangan Tiga utawi Pura sane keempon olih Krama Desa Adat Kusamba, patut ngaturin Ida Pedanda/Sang Bulinggih pinaka pamuput yadnya.

Pawos 48

Wiwitannia sang dados Pemangku luwire :

a. Mewiwit saking keturunan pemangku ring pura inucap;

b. Wenang nyanjan utawi saking sasudian Krama Desa Adat;

c. Wang cedangga tan wenang dados Pemangku ( Sang Amumpang paraning laku );

- d. Kesungkemin olih Krama Desa manut dresta;
- e. Pewintenannia kepuputang olih Ida Pedanda/Sulinggih;
- f. Wus pewintenan wenang ngerangsuk gegelaran Pemangku, patut kaping singgih manut wigunannia ngemargiang swadharmaning pemangku, tur tan ngalempasin sastra lan agama.

Pawos 49

Swadharmaning Pemangku luwire :

- a. Astiti bhakti ring Ida Sang Hyang Widi Wasa;
- b. Ngenterang utawi ngastawayang sehanan upakara ring pura;
- c. Ngelaksanayang sane mabuat suci ring pura, kaping ajeng rikalaning nedunang utawi ngunggahang Ida Bhatara;
- d. Pemangku Desa wenang nyiratang tirta ring krama desa;
- e. Nganutin tata kramaning pemangku desa patut ngusuma Dewa;
- f. Para pemangku desa sajeroning mawicara, tan kepatut muputang upakara;
- g. Risampun puput mawicara, patut maprayascita Raga kesaksinin antuk Prajuru Desa Adat.

Pawos 50

- (1) Ritatkala wenten yadnya ring pura-pura desa adat, Pemangku pura inucap patut polih pangerombo saking pemangku-pemangku desa sane sewosan, tur patut niwakang pituduh marep ring pemangku pangerombo inucap.
- (2) Yan prade pemangku sane marep kapialang, patut pemangku pura desa sane sewosan ngelaksanayang upakara ring pura manut pituduh Prajuru Adat.
- (3) Yan wenten pemangku keni ujar ala, pemangku inucap patut keprayascita manut agama, tur sang nguwehin ujar ala keni pamidanda manut perarem.
- (4) Yan wenten pemangku kebuktiang amumpang paraning laku, pemangku inucap tan wenang kasepuh, tur patut kagentosin.

Pawos 51

- (1) Yan wenten aturan-aturan utawi dana punia sane manjing ring pura patut kedruwe antuk pura inucap.
- (2) Sehanan sang sane maturan ring pura inucap, patut mesadok ring Prajuru adat, aturan inucap patut keunggahang ilikita tur keuningang ring paruman Krama Desa Adat.

- 3) Sahanan aturan kadi kecap ring ajeng, wenang keanggen ring pura inucap manut tetujon nyane.

Pawos 32

- 1) Sahanan warga desa adat patut nureksain raga, mangda kasukertan kalih kasucian kahyangan desane tan karusak muwah kaletihin.

- 2) Sane tan kalugra ngeranjing ke Pura Kahyangan desa sekadi ring sor :

a. Sane kasinanggeh cuntaka inggih punika ; kawentenan sane ngeletehin utawi nenten suci manut agama Hindu luwire :

1. Sebel kandel ngeraja swala, selami durung mabersih.
2. Sebel medruwe putra durung tutug akambuhan ( 42 rahina ) sane istri, sane lanang akepus odel utawi roras rahina ( 12 rahina ).
3. Sebel madruwe kulawarga kelampusan utawi kelayu sekaran manut senger ( kantos masapuh-sapuh ).
4. Makta sahanan barang sane kasinanggeh ngaletihin ( saluiring barang sane mawit saking watangan layuan pitra yadnya ).
5. Mabusana sane tan manut tata caraning kepura.
6. Sane ngelaksanayang gamia-gamana.

7. Cuntaka dening salah timpal wenang marisuda raga, marisuda desa, sedurung punika tan dados ngeranjing ke pura-pura desa.
8. Sahanan wewalungan suku pat, sajawaning mapapada.

9. Cuntaka dening mitra ngalang, sedurung sah wenten ngangkenin tur durung mawidi-widana.

b. Pretingkahing tan wenang ring pura sekadi ring sor :

1. Munggah tedun ring pelinggih, - pelinggih, sajawaning pituduh Prajuru.

2. Sirep awor lanang lan istri.

3. Mebacin, mewarih lan nyangsang busana.

4. Mangan kinum ngantos ketaluhan.

5. Marebat ring pura ngantos ngamedalang bawos ujar-ale, napi malih ngawinang medal rah.

- 3) Sang mamurug kadi kecaping ring ajeng keni pamidanda manut perarom, tur kawewehin upakara pemrayascita sepatutnia.

- 4) Yaning wenten jadma buduh tan karengayang antuk warisnya, mawastu ngarusak perahyangan, wenang warisnya kesandangin pamidanda upakara-upakara penyucian manut agama.

- (5) Yan wenten jadma kerawuhan ( nadi ) ring pura, prade kasumangsar-  
yain kengin kepintonin. Yan tan wiakti, jadma inucap kesisipang  
tur keni danda manut perarem.
- (6) Prade kahyangan desa katiban panca baya, pemangku ring pura  
inucap digelis atur supeksa ring Prajuru desa, yening tan sida  
antuk muktiang sane melaksana, wenang krama desa pamahayu pura  
inucap.
- (7) Ritatkala Galungan patut :
- a. Ngawit anggara wage wuku Dunggulan patut arayascita  
raga ( mebiya kala ) tur ngunggahang penyejer daksina ring  
kembulan, wenang sowang-sowang krama masang penjor tur  
medaging sanggah meganda wari.
  - b. Rahina Budha Kliwon wuku Dunggulan indik pemergi ngaturang  
wewantenan ring pura-pura desa, dadia, palbon, pamerajan  
lan sane sewosan manut kawentenan dresta.
- (8) Rahina Saniscara Kliwon wuku Kuningan pemergine pateh kadi Rahina  
Galungan.
- (9) Ritatkala ngaturang yadnya ( Dewa Yadnya ) ring Pura Desa, patut  
meduluran tetangguran lan kakidungan.

Palet 2

Rsi - Yadnya

Pawos 33

- (1) Sane pacang mediksa utawi medwijati, sadurunge patut polih penu-  
grahan saking Parisada Hindu Dharma, lan Kantor Agama, maka cihna  
sang pacang mediksa sampun uwus katetenin ring sahanan kawente-  
nannya, miwah ten lempas kadi kecaping sastra dresta.
- (2) Prajuru yogya nuntun krama desa masinggihang/mikukuhang Ida Sang  
Sulinggih, para Pemangku indik sesana manut linggihnia:
- (3) Krama desa patut ngaturang punia bhakti ring Ida Pedanda ritatka-  
la wus ngenterang pemuput yadnya.
- (4) Krama desa patut mateleb nunas panugrahan ring Ida Sang Sulinggih  
muwah Sang Sujana, sane presida mawesana kasutreptining desa  
manut kecaping agama.

Pawos 34

- (1) Luput ayah-ayahan desa manut perarem.
- (2) Luput peson-peson utawi paturunan ritatkala wenten upacara/yadnya  
ring pura desa.
- (3) Polih punia risampun usen pujawali.
- (4) Pawintennia kesenggra antuk Desa Adat.

- (5) Busana arangsukan kesanggra antuk desa adat amasa apisan tatkala rahina Pangusabaan ring Pura Segara.
- (6) Upacara Pitra Yadnya utawi atiwa-tiwa riwekas kesanggra oleh desa adat, indik wewantenan lan pengosongannia kewanten.

Pawos 55

- (1) Ngentosin Pemangku mawiwit sangkaning kadi ring sor :
  - a. Pemangku seda utawi lampus;
  - b. Pemangku sungkan tahunan;
  - c. Pemangku malih ngalap rabi, yaning strinia kantong maurip;
  - d. Pemangku kewusanang olih krama desa sangkaning kebuktiang melaksana dusta utawi amumpang paraning laku.
- (2) Yan wenten pemangku kewusanang sangkaning melaksana dusta utawi sangkaning pikahyun ngeraga pacang merarian, patut keni pami-danda ngewaliang pemereteka pawintenannia manut perarem.

Pawos 56

- (1) Sang Sulinggih patut nginggilang pemuput Yadnya ring wewidangan Desa Adat, risampun wus muputang yadnya inucap, wawu kesiyos jagat utawi kedura desa.
- (2) Krama desa patut sareng nitenin saha ketuntun antuk Prajuru adat mangda sahananing yadnya sane kawentenang kaicen pemuput olih Ida Pedanda manut kawentenannya sowang-sowang.
- (3) Krama desa patut ngaturang ayah sapenyeneng rauhing kala lepas Sang Sulinggih riwekas, katuntun antuk Prajuru adat.

Palet 3

Pitra - Yadnya

Pawos 57

- (1) Sahananing upakara pemereteka jadma lampus, kebawos Pitra Yadnya sekadi : meresihin sawa, mendem sawa, ngeseng sawa ( atiwa-tiwa ) wus punika ngelanturang antuk upakara ngerorasin ( mukur ) rawuh ngalinggihang ring prahyangan dewa sang pitara.
- (2) Mendem sawa utawi ngeseng sawa :
  - a. Genah mendem utawi ngeseng sawa ring setra/tunon ugi.
  - b. Mendem sawa utawi atiwa-tiwa tan kalugra rikala rahina pasah.
  - c. Ida Pedanda/Sang Sulinggih polih pemargi lan linggih manut dresta.
  - d. Tan dados nekung sawa langkungan ring pitung rahina, saja-waning pacang jagi kapelebonang utawi keabenang.

- (3) Yening prade wenten mamurug sekadi kecap ring ajeng wenang keni danda gung artha : 300.
- (4) Prade wenten jadma lampus sankaning ulah pati, salah pati kengin kebakta budal tur kesanggra antuk banten pengulap lan penebusan upakara pemeretekannia nganutin panugrahan Ida Pedanda.
- (5) Yan wenten anak istri mobot lampus, tan wenang kependem utawi keurug sedurung bobotannia embas.
- (6) Yening wenten jadma lampus ring carik, tegal sang madruwe kepatutan utawi warisnya patut mrayascita lan pecaruan Eka Sata, tur kelaksanayang ring genah inucap.
- (7) Yan jadma padem inucap ring ajeng tan keni kauningin, wenang katur ring Guru Wisesa, mungguhing upakara ring genah inucap kelaksanayang olih Desa Adat. Prade kepungkur wenten ngangkenin sang ngilingin patut keni panukun setra gung artha : 500.
- (8) Yening wenten krama banjar madruwe jadma kelampusan patut karyane kesanggra olih krama banjar, Klian Banjar digelis nyuarayang kulkul ciri wenten sinalih tunggil warga banjar lampus, tur krama banjar patut mekarya pengosongan/pepaga jantos puput mendem sawa ring setra utawi tunon.
- (9) Ritatkala wenten krama ngaben utawi melebonang pemargine sekadi ring sor :
  - a. Krama Banjar patut matetulung/nyangra karya sang ngaben utawi melebonang ngawit mekarya rompok, nanging sawa lan makta pemereman/wadah ke setra utawi tunon ngantos nganyut ring segara;
  - b. Krama patus ngamedalin patus ajengan saha runtutan ipun manut dresta.
  - c. Yen wenten krama patus tan ngamedalin patus, patut kapidanda manut perarem.

Pawos 58

- (1) Sajeroning awarsa krama sane sampun polih nuduk patus prade malih ngaben wiadin malebonang tan kapatutang malih nuduk patus ajengan, nanging kangkat polih patus karya kemawon.
- (2) Prade sajeroning sasih tunggil wenten krama patus pacang ngaben utawi malebonang lintang ring adiri tur sami sampun mapiuning ring klian Banjar, yan rahina padewasanne masewosan wenang sowang-sawang polih patus mepek.
- (3) Yan ritatkala pemargi ngaben utawi palebon punika tunggil rahina padewasannyane pemargin patus patut kaepah.
- (4) Yan prade krama patus pacang ngaben utawi malebonang dajakan, kangkat nuduk patus sakewanten pemargine tan lintangan ring pitung rahina ngawit saking kelampusan tur tan tiwal ring ayat siki (1).

Pawos 59

- (1) Rikalaning nganter sawa ke setra/tunon, seluiring sane nganter tan dados ngelangkungin sawa, sajawaning sane makta eteh-ete upakaranya.

- (2) Pemangine mangda trepti tur dabdab tan kengin bewig-wigan utawi ngarap sawa apan tan manut ring petitis Parisada Hindu Dharma, napimalih ngantos ngerusak sekadi : wabah/pemeraman, siwah sane lian-lianan, ngantos ngesetuang pakewuh ring sang sadruwe yadnya. Yan wenten krama masurug kecaping ajeng wentang keni pamidanda manut perarem.
- (3) Krama sane nganter patut mebusana adat sanistannya maselempot.
- (4) Besampune rawuh ring setra utawi tunon tan dados malinggal sedurung wenten atur piuning saking Prajuru/Klian Banjar.

Pawos 60

- (1) Kelampusan :
  - a. Cuntaka bebanjaran tigang ( 3 ) rahina saking wus mendem.
  - b. Kulawargannya sajeroning pekarangan utawi warisania manut drestanipun.
  - c. Yan anak rare durung kepus pungsed cuntakannya petang dasa kalih rahina ( 42 rahina ).
- (2) Leteh ring raga :
  - a. Ngeraja Swala, tigang ( 3 ) rahina ngawit saking ngeraja swala utawi selasinipun durung mebersih.
  - b. Ngembasang putra petang dasa kalih rahina ( 42 rahina ) ngawit putrane embas ngantos maupacara tutug kambuhan.
  - c. Keruron petang dasa kalih rahina ( 42 rahina ) ngawit saking keruron.

Palet 4

Manusa - Yadnya

Pawos 61

- (1) Sane kebawos manusa yadnya inggih punika : sahananing upacara dharmaning manusa, ngawit saking patemoning kama bang kelawan kama petak sajeroning garba, lantos selawenla maurip.
- (2) Upacara kadi ring ajeng dudonannya sekadi ring sor :
  - a. Pakiwahan;
  - b. Megecong-gedongan;
  - c. Rare waku embas;
  - d. Kepus wodel;
  - e. Tutug kambuhan ( 42 rahina );
  - f. Tigang sesih ( nelukulanin );
  - g. Aotih ( nem sesih );
  - h. Mepetik rambut ( tigang woton );
  - i. Mekupek ( meketus gigi );
  - j. Tutug kelih ( munggeh deha utawi teruna );
  - k. Mepandee ( metatah ).

- (3) Upacara inucap ring ajeng nganutin kecaping agama ; nista, madya, lan utama tur pemargine nganutin dresta miwah sima ring Desa Adat .

Palet 5

Bhuta - Yadnya

Pawos 62

- 1) Bhuta yadnya inggih punika sehanan upacara/upakara pabyekala ring pertiwi lan kahyangan muwah saha upacara ring bebhutan.
- 2) Upacara pabyekala ring sarwa prani luwire :
  - a. Ring sarwa tumuwuh rahina Saniscara Kliwon wuku Wariga, kebawos Tumpek Pengatag/Tumpek Uduh.
  - b. Ring sarwa ingon-ingon rahina Saniscara Kliwon wuku Uye, kebawos Tumpek Kandang.
- 3) Upacara pabyekala ring pertiwi, kahyangan lan bebhutan kewastanin mecaru. Pecaruan inucap ring ajeng, nista, madya, lan utama manut wiguna kadi ring sor :
  - a. Eka Sata;
  - b. Panca Sata;
  - c. Panca Sanak/manca sanak;
  - d. Resi Gana;
  - e. Tawur Agung;
  - f. Panca Kludi;
  - g. Melabuh Dentuh;
  - h. Muwah sane sewosan.
- 4) Sewos kadi inucap ring ajeng kawentenang upakara :
  - a. Yadnya sesa/mejot-jotan nyabran wus ngerateng;
  - b. Mesapuh-sapuh rikala pacang wali ring pura.

Pawos 63

- 1) Rikalaning Tilem Kesanga kawentenang Tawur Kesanga patut kelaksanayang sekadi ring sor :
  - a. Melasti kesegara, tata cara lan dina manut perarem;
  - b. Rawuh saking melasti Ida Bhatara nyejer ring Bale Agung;
  - c. Pecaruan desa kewentenang ring catus pata / pempatan agung manut perarem, muwah ageng caru manca sata. Prajuru desa patut nunas tirta lan nasi tawur kesanga manut tetiwak saking Parisada Hindu Dharma;
  - d. Ring sowang-sowang Banjar pecaruania Eka sata;

- e. Sowang-sowang paumahan nganutin tetiwak saking Parisada Hindu Dharma.
- (2) Ngawentenang pangerupukan/mebuhu-buhu kepidabdabin olih Prajuru desa.
- (3) Ring rahina penyepian patut ngamargiang brata penyepian :
- Amati Geni;
  - Amati Karya;
  - Amati Lelungaan;
  - Amati Lelanguan.
- (4) Pemargin brata penyepian inucap manut perarem, katuntun olih Prajuru adat, tur kacihnayang pengawite antuk suaran kulkul.
- (5) Sane mamurug brata penyepian inucap, patut keni pamidanda manut perarem, sejawaning sane polih wak-wakan saking Prajuru Desa utawi Guru Wisesa.
- (6) Pangembak brata penyepian macihna suaran kulkul.
- (7) Riwus rahina nyepi ( benjangne ) maka cihna pengawit Icaka Warsa, patut sowang warga desa sami ngakeamayang raga ( Sila Krama ).

#### SARBA V

#### SUKRETA TATA PAWONGAN

##### Palet 1

##### Indik Pawiwahan

##### Pawos 64

- (1) Pawiwahan inggih punika : panunggalan purusa lan pradana melarapan antuk suka cita kedulurin upasaksi sekala lan niskala.
- (2) Pidabdab pawiwahan ring Desa Adat kamanggehang pemargin purusa, kepatut sang kepurusa sane ngalap rabi.
- (3) Pemargin pawiwahan wenten palih-palihanipun luire :
- Pepadikan;
  - Merangkat/ngerorod, memargi riyin sesiliban, wus punika wawu kekrunayang;
  - Nyeburin/silihdihi, sang wadon meraga purusa, sane lanang meperagaman istri lan pewiwahannia ring genah sang wadon.
- (4) Pidabdab sang pacang mawiwaha luwire :
- Sane sampun kasinanggeh munggah teruna utawi deha;
  - Sangkaning pada suka cita utawi pada rena lan tan kapariksa;
  - Yan ngambil sewos agama; patut kamanggala antuk wewantenan sudi wadani nganutin kecaping agama Hindu;

d. Tan ngalempasin Undang-Undang Perkawinan No. 1 tahun 1974 sane kelajerang antuk Guru Wisesa.

- (5) Yan tan manut sekadi kecaping ring ajeng, pawiwahane tan kasi-nanggeh sah, yan memurug patut keni pamidanda manut perarem.

Pawos 65

- (1) Pawiwahan sane kepatutang ring Desa Adat, sekadi ring sor :
- Pemargin pawiwahan sampun nganutin pidabdab pawiwahan Desa Adat;
  - Sampun kemargiang pabyekala utawi mawidhi widana;
  - Kesaksinin antuk Prajuru Desa lan Guru Wisesa;
  - Sampun kailikitayang ring banjar lan desa adat;
  - Sampun matengeran suaran kulkul manut dresta;
  - Mangda nganutin Undang-undang no. 1 tahun 1974.
- (2) Perabian/pawiwahan sane tan manut kadi ring ajeng kesinanggeh tan patut ( tan sah ).

Pawos 66

Tata cara perabian ring Desa Adat sekadi ring sor :

- Sang sapa sira ugi pacang merabian ( ngewarangang ) kulawargan nyane patut masadok ring Prajuru, selanturnya Prajuru maritetes manut tan manut indik perabianne.
- Pemargin indik pepadikan :
  - Mekruna ping tiga ; inggih punika ngedih ping kalih, raris pengambilan utawi manut kawentenan kulawarga sang wadon;
  - Risampun tutug rahina pengambilannia manut pawilangan, wargan sang pradana lan purusa, patut ngerauhang Prajuru adat ( Bendesa Adat ) pinaka saksi.
- Prade ngerangkat utawi ngerorod, kulawargan sang lanang patut ngemargiang sekadi ring sor :
  - Mapesedek ring sang nruwenang kepatutan, tan kasepan ring awengi;
  - Ngawentenang pangelukuan utawi-mepelaku pang tiga manut tata cara utawi manut kawentenan kulawargan sang wadon.
- Riwus kewentenan pawilangan inucap ring ajeng sampun manut, kulawargan sang istri masadok ring Klian Banjar nunas teteng-eran suaran kulkul manut dresta.
- Yan sampun pang tiga mekruna, pangelukuannya durung naler puput, wenang sang ngambil rabi ( kulawargannia ) masadok indik pemargine, ring Prajuru adat utawi ring Guru Wisesa.
- Yaning wenten ngambil istri ngunggahang, kengin sang sane ngambil masadok ring Prajuru utawi ring Guru Wisesa, nunas mangde mapisedek ring sang sane medrebe oka istri maduluran rerapi saking sang alaki-rabi, kelanturang wadone patut kaupa-kara patiwangi.

Pawos 67

- (1) Manut Undang-Undang Perkawinan nomor 1 tahun 1974 sane kelajerang olih Guru Wisesa, tur sampun kesungkemin, sang lanang patut merabi adiri, sejawaning wenten wak pasubayan sane kewehin antuk rabine sane rihinan tur sampun wenten ilikita saking Pengadilan.
- (2) Yan wenten anak istri daha mobot, patut digelis kesadokang ring Bendesa Adat, tur digelis kejangkepan antuk Prajuru Adat ring sang kasinanggeh mobotin. Prade sang mobotin tan nganutin. Jadma inucap keni pamidanda gung artha 4.500 ( petang tali limang atus ), tur bobotannya patut kaupakara (mawidi widana) manut kecap sastra Agama Hindu, risampune embas rarene katiba ring sang istri ( kapredana ).
- (3) Prade tan wenten sane ngankenin bobotan inucap ring ajeng, kulawargannya patut keni mepahayu ring desa adat lan keni pamidanda manut perarem, tur rarene keupakara manut kecap sastra Agama Hindu. Jadma sane ketuduh mobotin tan nganken, patut kedewa saksiang ( medewa saksi ).
- (4) Prade sang mobot nwa paksa pengangkene, wenang sang mobot keni pamidanda gung artha 500, kebawos nuke anyut pati grape tur mrayascita ring desa adat.
- (5) Yan jadma sampun alaki-rabi keangkenin madruwe bobotan inucap tur sang katuduh sumanggup pacang ngambil sang mobot, pemargine manut sulur daging Undang-Undang Perkawinan nomor 1 tahun 1974. Prade tan kalugra antuk sang ngawiwenang, sang lanang ngambil anake istri sane mobot, tur risampune embas rarene, sang lanang wenang ngupakara miwah pamahayu rarene.

Palet 2

Indik - Nyapian

Pawos 68

- (1) Sang wus merabian ( palas ) tan sida malih satinut alaki-rabi, kebawos nyapian, yan wus merabian sankaning seda kebawos balu.
- (2). Sang ayat pacang nyapian patut nganutin pemargin kadi daging Undang-Undang Perkawinan nomor 1 tahun 1974, jadma inucap mangda wenten atur supeksa ring Guru Wisesa.
- (3) Sang pacang nyapian sesampune kesahang antuk sang rumawos ( Pengadilan ) tur sampun molihang ilikita mapalasan merabian, patut mapiuning ring Prajuru, tur Prajuru wenang namiakang ring desa /Banjar.
- (4) Yan riwekas sang nyapian adung malih, tur ngelaksanayang pawihan patut keni pamidanda gung artha 1500.

Pawos 69

- (1) Balu luh katinggal lampus antuk suwaminnia utawi balu sane pecak nyeburin patut ngemargiang swadarma kadi ring sor :
  - a. Ngamanggehang patibrata, tan dados ngemargiang dreti krama;
  - b. Ngemargiang sahananing ayah-krama;

- (2) Balu sane tan pageh ring swadharmannya luwire :
- Matingkah dretikrama, miwah sane sewosan;
  - Matilar tan pesadok kantos langkung 6 ( enem ) sasih;
  - Lempas ring swadharmening balu, tan presida ngehehin solah maprewerti arep ring kulawarga purusa.
- (3) Balu sane tan pageh kadi kecap ring ajeng wenang ketundung olih kaluarga sang purusa saha tan polih pah-pahan waris, tur sampun polih pematut saking Guru Wisesa.
- (4) Prade wenten balu tanpa sentana katundung olih kulawargannia kepurusa patut polih pah-pahan peguna kayan, tur taler sampun polih pematut saking Guru Wisesa.
- (5) Yan wenten anak balu luh pacang mawiwaha malih, tan wenang nge-laksanayang pawiwahan sedurung lintang ring senger pang tiga ngeraja swala, yan mamurug keni pamidanda gung artha 500.

### Palet 3

#### Indik - Sentana

#### Pawos 70

- (1) Mungguwing sane kebawos sentana wenten kaucap ; preti sentana, sentana rajeg lan sentana paperasan.
- (2) Preti Sentana inggih punika ; Sentana sane metu saking pawiwahan sane kebawos pastika patut ngangge upakara widhi widana.
- (3) Yan prade pawiwahan tan ngowetuang sentana, kengin ngedih sentana antuk upasaksi sekala lan niskala sane kewastanin Sentana Paperasan.
- Sentana Rajeg inggih punika ; Preti sentana wadon ( predana ) sane kemanggehang lanang ( purusa ) tur risampun ngelaksanayang pawiwahan keceburin/seledihi.
- (3) Sane dados kamanggehang sentana rajeg inggih punika :
- Preti sentana wadon, patut kerajegang wantah adiri;
  - Sampun kemanggehang dados preti sentana lanang ( purusa );
  - Pawiwahan keceburin utawi seledihi jadma sane magama Hindu.
- (6) Sang sane pacang ngemanggehang sentana rajeg, sedurunge patut mesadok rihin ring Klian Banjar utawi Prajuru, selanturnya Klian Banjar utawi Prajuru adat patut namiakang ring bebanjaraan utawi ring Desa Adat.

- (1) Sapa sira ugi krama sane wenten pawilangan pacang ngedih sentana, patut mesadok dumun ring Klian Banjar pinih kedik malih petang sasih pacang padewasaan paperasan.
- (2) Klian Banjar namiakang ring ikrama banjar, lan Klian Banjar mapiuning ring Bendesa Adat miwah Kepala Desa.
- (3) Bendesa Adat digelis namiakang ring krama desa, risampun tigang sasih suwennia tan wenten pecadel, upakara widhi widana peperasan memargi manut dewasa, lan kesaksiang antuk Klian Banjar, Bendesa Adat, Kepala Dusun lan Kepala Desa. Riwus punika sang memeras digelis matur upeksa ring Pengadilan nunas ilikita paperasan.

- (1) Sane patut keperas anggen sentana kadi ring sor :
  - a. Sang keperas kepatut sane meagama Hindu;
  - b. Mautama saking waris pancor kepurusa;
  - c. Yaning tan wenten saking pancor kepurusa, kengin mewiwit saking kulawarga wadu tunggal sanggah, Paibon, Merajan lan Dadya.
  - d. Yaning tan wenten sekadi kecaping ring ajeng, dados ngedih anak sewos, yaning tan wenten kakobetan.
- (2) Paperasan punika sinaggeh sampun puput tur patut, yaning sampun macihna :
  - a. Pewidhi widanaan peperasan;
  - b. Kesaksiang antuk Prajuru Adat, saha kadamiakang ring paruman Banjar utawi Desa;
  - c. Wenten ilikita dudonannia minakadi antuk artha berana paperasan lan sane sewosan.
- (3) Yaning pamerasan sampun kemargiang kepatutang nyelosin patus sang ngedih.
- (4) Yaning pacang meras sentana tan dados sane sampun bulangkep utawi sampun mawiwahan, punika kebawos ngencak patus.
- (5) Meras sentana kengin langkungan ring adiri, lanang utawi wadon.
- (6) Yan prade serek sang pacang ngedih sentana krama sane sampun mejangkepan ( mawiwahan ) punika wenten sulur pemargi :
  - a. Sang ngedih patut kantong meayah marep tur mapatus marep;
  - b. Sapunika taler sang koidih mangda kantong tedun meayah marep tur mepatus marep;
  - c. Sang ngedih sentana inucap ring ajeng, wenang naur pengembas tali pengiket krama gung artha 100.

- (1) Sane kebawos pemargi seledihi, anak lanang rumasa kadi anak istri ring genah istrinia seantukan istrinia rumasa purusa, saking petemon sang kalih wetu sentana lanang punika sane rajeg sentana purusa.
- (2) Maka pikukuh miwah pastikaning pemargi seledihi ring ajeng sulur pemargine pateh kadi pemargi peperasan indik piuninge ring Prajuru Desa.
- (3) Sakewanten yan prade piuninge ring prajuru desa wawu katur risampun puput upakara pawiwahan, punika tan kepatutang, duwaning kebawos boya seledihi, punika kewastanin anak istri kerorodang anak lanang.
- (4) Sane kebawos nyeburin merupa pemargi pateh sekadi seledihi, sake-wanten nyeburin sang lanang saking tunggal waris utawi tunggal kawitan.
- (5) Palleh pemargi nyeburin miwah seledihi indik piuninge ring prajuru desa lan pedamiak ring desa pemargine pateh kadi pemargi peperasan.
- (6) Yan sampun manut pemargine kadi ring ajeng wawu dados sang ngedih nyada duwaning sampun kesundul antuk imantu.

Palet 4

Indik - Warisan

Pawos 74

- (1) Sane kasinanggeh warisan inggih punika ; tetamian artha berana, saha ayah-ayahan ngupadi sukertan sekala lan niskala saking keluhurannia marep ring turunannia.
- (2) Sane kaucap warisan luwiro :
  - a. Duwe tengah, karang paumahan lan sanggah utawi merajan;
  - b. Peguna-kayan, tadtadan, jiwadana, lan utang piutang;
  - c. Wenten artha berana muah tetegenan utawi ayah-ayahan marupa warisan.
- (3) Sane kebawos waris inggih punika :
  - a. Preti sentana lanang utawi wadon;
  - b. Sentana Rajeg;
  - c. Sentana peperasan lanang utawi wadon.
- (4) Prade tan wenten sekadi ring ajeng, kang sinanggeh waris :
  - a. Turunan purusa pernah ngunggahang sekadi : Rerama, Rerama-dia, rerama dimisan lan rerama dimindon;
  - b. Turunan purusa pernah kesamping sekadi : Semeton, Keponakau, misan lan mindon;
  - c. Yan tan wenten kadi kecaping ring ajeng dados kewaris olih tunggal merajan manut reruntutannia.

- (1) Swadharmaning waris patut manerima saha ngutsahayang tetamian, ayah-ayahan saking keluhurannia mekadi ngerombo sanggah, merajan, pura Paibon, pura Dadya, Pura Kahyangan saha pekarangannia.
- (2) Ngabenang/melebonang sang kewarisin saha ngelanturang upacara pitra yadnya sepatutnya.
- (3) Naurin hutang-piutang sang kewarisin, kaping ajeng utang ring Banjar, ring Desa muwah utang ring Pura lan utang-utang sane sewosan.

Pawos 76

- (1) Pangepahan waris kangkat kemargiang sekadi ring sor :
  - a. Risampun buntas ngelaksanayang Pitra Yadnya lan utang-utang sang kewarisin ketawur;
  - b. Warisan sangkaning artha berana peguna kaya kaepah pada, marep ring waris lanang;
  - c. Karang ayahan desa, kaomong antuk warisnya sane jumenek ring karang inucap.
- (2) Sinalih tunggil waris ring ajeng tan polih pah-pahan wewarisan prade ipun :
  - a. Alpaka Guru Rupaka utawi Guru Swadiaya;
  - b. Merupa sentana rajeg sane sampun kesah mawiwaha;
  - c. Marupa sentana sane mawiwaha nyeburin kepekurenan lian;
  - d. Merupa sentana sane sampun pastika puput kaperas kepekurenan lian.
- (3) Sentana waris sane nilar agama Hindu tan kangkat polih pah-pahan warisan.
- (4) Yening wenten sentana wadon ngelaksanayang lokika sanggraha ( Nyele polah ) mewastu medruwe pianak kewastanin sentana, alpaka guru, yan pianak ipune keangkenin ring pengeling sirnia, kengin pianak inucap ngewaris peguna kaya keramane wadon kemawon.
- (5) Sane kangkat ngewaris pemupu komawon luwira :
  - a. Balu wadon;
  - b. Balu lanang sane mawit saking pawiwahan nyeburin;
  - c. Sang mulih kadaha, seantukan ring pawiwahan dumun sampun kaucap ninggal kedaton;
  - d. Daha tua sane rajeg.

- (6) Bekantune maurip ikang yayah kang at ngewehin jiwa dana sarep ring putrinna sane sampun mawiwaha punika manut sulur :
- Yan kasugihan antuk nami, tan wenang ikang yayah ngewehin jiwa dana ring putrinna;
  - Yan saking guna-kaya sang yayah, wenang ikang yayah nguwahin putrinna jiwa dana;
  - Riwakas yening jiwa dana punika telas keadol, raris mapalasan makurenan mewali kedaha, tan polih melih pah-pahan waris;
  - Prade sang makta jiwa-dana lampus, jiwa dana punika tan wenang mewali, seantukan punika keaggen ngupakara sang lampus.
- (7) Prade sejeroning keluarga wenten waris langkung ring adiri patut:
- Kawentenang paiguman indik pedum waris inucap;
  - Yening tan presida kapuputang, katunasang tatimbang ring Bendesa Adat/Prajuru, taler yan ten lila kengin nunasang ring sang rumawas ( Pengadilan ).
- (8) Prade waris istri mapalasan makurenan mulih kedaha makta bobotan, riwekas embas bobotane lanang widadin istri anake alit inucap tan wenang polih pah-pahan waris.

#### Pawos 77

Prade wenten karang keputungan, wenang Bendesa Adat/Prajuru mawosin tur nureksa sila-silanna saha nibakang karang punika ring :

- Waris saking kepurusa;
- Papernahan kesamping, yening tan wenten papernahan, kpatutang ring pedadyaan manut reruntutanna;
- Yening tan wenten sekadi kecap ring ajeng wawu katiwakang ring sang tan madruwe karang paumahan sane kasinanggeh ngarep, matunggalan Desa Adat miwah megama Hindu. Sang katiwakin karang punika wenang mariteka sang pecak madrebe karang inucap, manut kecaping agama Hindu.

#### SARGA VI

#### WICARA LAN PAMIDANDA

#### Palet 1

#### Indik - Wicara

#### Pawos 78

- Sang wenang mawosin utawi mutusang wicara ring Desa Adat, inggih punika sane kasinanggeh Kertha Desa, Prajuru adat lan banjar.
- Pemutus tetepasan nganutin awig-awig desa, patitis lan pamikukuh.
- Prade wicara punika tan presida molihang pemutus ring desa adat sang mawicara kengin nunasang pamutus ring Guru Wisesa.

- (4) Sahananing wicara sane mewiwit saking laksana laksana kas sedaging awig-awig sane mawesana ngaruareng jagat/nora ring desa, patut digelis kabawosin antuk Kreta Desa tur keni pamidanda manut perarem.
- (5) Wicara sekadi kecaping ajeng, patut ngantosang pesadok saking sang nunas bawos.
- (6) Panepas patut pastika, nyantenang iwang patut melarapan antuk Catur Dresta ( Kuna Dresta, Loka Dresta, Desa Dresta lan Sastra Dresta ) muah tan maren nepek ring Tri Premana ( Saksi, Iliki-ta lan Bukthi ).

Palet 2

Indik Pamidanda

Pawos 79

- (1) Banjar utawi desa wenang niwakang pamidanda ring warga sane kebawos sisip.
- (2) Sahanan patiwak pamidanda kelaksanayang olih Prajuru Desa.
- (3) Bacak-bacakan pamidanda luwire :
  - a. Danda artha/dedosan saha penikelnia utawi penikel paturunan;
  - b. Ayah-ayahan panukun kesisipan;
  - c. Pangupakara;
  - d. Karampag/Karangdain;
  - e. Kedaut tanah ayahan desa utawi pipilnia ring Banjar/Desa;
  - f. Lan pamidanda-pamidanda sewosan.
- (4) Gung alit pamidanda sane ketiwakang, patut mesor singgih manut ring kasisipannia, tur keputusang ring paruman Banjar utawi paruman Desa Adat.
- (5) Sahanan jinah utawi rajabrana mawit saking pamidanda ngeranjing dados druwen Banjar utawi druwen Desa manut kawentenannya.
- (6)
  - a. Sahanan panyacahing sedaging awig-awig puniki manut dresta, yan wenten krama keni pamidanda, dedosan ngetang wrat jinah bolong.
  - b. Tatawuran pamidanda, dedosan antuk jinah bolong, dados kagentosin antuk jinah Republik Indonesia sane kantun manggeh, kaetang pengargan tate pasar pematut Desa.

Pawos 80

- (1) Yan wenten krama mautang ring Banjar utawi Desa, antuk dedosan, paturunan lan pamidanda, yan wenten bawos wak penanggeh, polih senger asasih, yan sampun manut senger nenten naur wenang katikelang, yaning nikel taler nenten naur wenang karangdain/karampag antuk ikrama Banjar utawi Desa.
- (2) Tata cara ngelaksanayang rerangdaan/rerampagan sekadi ring sor :

- a. Kadulurin antuk piteket saking Prajuru murep ring sang pacang kerangdain/kerampag;
- b. Pemargin ngerangdain/rerampagan kelaksanayang olih Prajuru kesarengin antuk krama Banjar utawi Desa;
- c. Sang ngerangdain/ngerampag mangda sangkuning darsana, ngambil rerampagan utawi nyawenin barang utawi taneh tumpah lan wewalungan manut ring hutang sang kerangdain/kerampag;
- d. Rerangdaan/rerampagan kaunggahan ring ilikita tur kesaksian;
- e. Prajuru patut mitektin sang kerampag mangda digelis nebus druwenia sedurung lintang awuku, ring kanjekan kutus rahina kangkat keadoli;
- f. Yening sampun manut senger nenten katebus, menang kelelang, lelangannia kaanggan nuku hutang nyane ring Banjar/Desa tur kawuwuhin solasan, sisannya kawaliang ring sang kerangdain/kerampag.

Tan kepatutang utawi tan kewenang ngerangdain/ngerampag saluiring barang sane patut kesuciang manut agama, miwah mademang pengupa-jiwa sang kerangdain/kerampag.

Prade sang kerangdain/kerampag ngewara utawi ngalangin pemargin inucap ring ajeng, punika mawasta tan nganutin daging awig-awig lan lempas ring swadharmaning krama, jadma punika menang kedaut pipilnia ring Banjar/Desa, jadma punika kebawos nora tan polih pengayoman krama Desa, Banjar, tur tan kedadosang ngangge sehananing serana sane kadruwe antuk Banjar/Desa sane nenten ring wewidangan Desa Adat.

Pamidanda sisip sekadi ring ajeng presidha purna buntas, yan sang sisip sampun :

- a. Nunas gung sinaampura ring krama Banjar utawi Desa riantukan purun nguwak pasubayan ( pesuara ring perarem ) maduluran antuk banten Pras Pejati;
- b. Nawur pamidanda penguwak suara, gung artha duk pacang kerangdain/kerampag tur mapeweweh solasan manut laminnia, mehutang tur jadma punika mawali keterima sekadi patut.

#### Pawos 8!

Sadurung pematut desa pacang niwakang lad ring krama, pinih rihin prajuru desa patut dituturin miwah midabdabin sang pacang keelad sangdanne presidha tan durus kaeladang mekrama. Yan sampun ngantos tigang sangkepan prajuru desa mapitatur miwah midabdabin, taler tan katinutin daging pitatur prajuru desane, sepisanan rikala punika kaeladang mekrama.

Bebacatan sane patut dados kaeladang mekrama Banjar utawi mekrama Desa, punika krama tan nganutin pemargin sekadi ring sor puniki :

- a. Tan neur utang saha penikelnya ring Banjar utawi ring Desa;
- b. Tan nganutin daging awig-awig puniki;
- c. Tan nganutin pematut parumar krama Banjar utawi parumar Desa.

- (4) Manut pemargin jadma sane sampun kaeladang sekadi ring sor :
- Sang sane sampun kaeladang mekrama, tan polih pah-pahan saduwen-duwen Banjar utawi Desa;
  - Yan mendem/nanem rikala kelampusan utawi atiwa-tiwa kangkat ring setra monggalan, tur wenang keni penanjung batu/penukun setra gung artha 100 kang sawa;
  - Rikalaning sang lad madruwe karya yadnya tan wenang nyelang druwen Banjar utawi Desa;
  - Sane sampun kaeladang tan wenang ngeranjing ke Pura Kahyangan Tiga lan Pura Segara druwen Desa Adat.
- (5) Riwekas prade sang lad pacang mewali ngeranjing mekrama Banjar utawi mekrama Desa, punika manut pamutus paruman krama Banjar utawi Desa.

## SARGA VII

### NGUWAH NGUWUHIN AWIG-AWIG

#### Pawos 02

- Nguwah nguwuhin awig-awig puniki patut kelaksanayang antuk paruman krama Desa Adat.
- Paruman inucap patut mejalaran antuk gilik-saguluk pemargin perareman krama Desa, semuyub jaga nguwah nguwuhin awig-awig manut babuatannia.
- Pamutus bebawos presida puput, yan sampun kramane lan Prajuru gilik-saguluk utawi kengin mejalaran pasuara (wiwalangan suara).
- Yan mejalaran wewilangan suara gaguatnia sekadi ring sor :
  - Krama desa sane tedun parum sanistannia kalih pah tiga ( 2/3 ) saking akuweh krama Desa Adat;
  - Suara utawi wewilangan suara sane nganutin sanistannia satenga langkung adiri saking akuweh krama sane sareng parum.
- Wiwit paruman indik nguwah-nguwuhin awig-awig kadi ring ajeng kengin kamedalang antuk Bendesa Adat, Prajuru Adat, Klian Banjar utawi krama niri-niri.

## SARGA VIII

### PAMUPUT

#### Pawos 03

- Awig-awig puniki kewastanin, " Awig-Awig Desa Adat Kusamba ".
- Awig-awig puniki komargiang ngawit saking keraremin tur komanggehang antuk krama Desa Adat.

- (3) Awig-awig Desa Adat puniki, manggeh tur kelaksanayang ring sajeroning wewidangan Desa Adat sekadi inucap ring ajeng.
- (4) Awig-awig Desa Adat Kusamba puniki, nganinin sahananing warga lan krama Desa Adat miwah sahananing sane ke kuwub antuk Desa Adat.

Pawos 84

- (1) Sakeluwire pemargi sane wenten sedurung awig-awig puniki ke sungkemin presida memargi sepatutnia, manut Tri Pramana ( Saksi, Ilikita lan Bukti ).
- (2) Saluwiring pemargi sane jagi rawuh patut keanutang ring sedaging awig-awig puniki.
- (3) Saluwiring pemargi pekraman sane durung kebawos utawi durung munggah ring sejeroning awig-awig puniki patut kelaksanayang manut dresta utawi tata cara sane sampun ketah memargi kedulurin antuk perarem Desa Adat.

Pawos 85

- (1) Awig-awig puniki kesungkemin duk perarem Krama Desa Adat ring rahina Saniscara Kliwon, wuku Landep, sasih Kasa, Tumpek Landep, icaka 1915, tanggal masehi 10 Juli 1993, magenah ring Pura Puseh.
- (2) Awig-awig puniki kelingga tanganin olih : Bendesa Adat, Penyarikan, Bhaga Prahyangan, Bhaga Pawongan, Bhaga Palemahan, Klian Tempek, Klian-klian Banjar, kesaksiang antuk Kepala Dusun lan Kepala Desa sane ngawidangin Desa Adat Kusamba, maka cihna pemutusan.
- (3) Kakukuhang/kesaksiang olih Bapak Bupati Kepala Daerah Tingkat II Klungkung.

Bendesa Adat lan Prajuru Adat

Bendesa Adat,



( Anak Agung Anom Purwa ).




Penyarikan,




( I Ketut Begeng Arnaya Bsc ).

Bhaga Prahyangan,




( Anak Agung Gde Anom Kalas )

Bhaga Pawongan,




( Anak Agung Gde Sayang )

Bhaga Palemahan,




( I Nyoman Rupa )


Klian Tempek Kawan,

  
( I Nayan Mirtha )

Klian Tempek Kangin,

  
( Ida Bagus Nyoman Switajaya, BA )


Klian Banjar Rame,

  
( Pan Lapur )


Klian Banjar Batur,

  
( I Ketut Pica )


Klian Br. Presatria I,

  
( I Dewa Nyoman Hegig )


Klian Br. Presatria II,

  
( I Dewa Gde Sena, SH )

Klian Br. Tengah,

  
( I Gst. Ngurah Ariawan )


Klian Br. Agung,

  
( A. A. Gde Rai Sutha )

Klian Br. Bingin,


  
( I Wayan Rigeq )

Klian Br. Anyar,

  
( I Wayan Suratna )

Kepala Dusun dan Kepala Desa


Kepala Dusun Br. Rame,


  
( I Nengah Ardana )

Kepala Dusun Br. Presatria,


  
( I Dewa Made Hegig )

Kepala Dusun Br. Bingin,


  
( I Nyoman Warsana )




Kepala Desa Kusamba,

  
( Agung Gde Suteja )

Mengucapkan dan telah dicatatkan



KEPALA DAERAH  
TINGKAT II KLUNGKUNG

  
( Tjokorde Gde Agung )

PANITIA PENYURATAN

AWIG - AWIG DESA ADAT KUSAMBA

---

PENASEHAT : 1. Bendesa Adat.  
2. Kepala Desa Kusamba.

K E T U A : Anak Agung Gede Sayang.

SEKRETARIS : I Ketut Degeng Arnaya, Bsc.

BENDAHARA : I Ketut Sukerata.

1. BIDANG PRAHYANGAN :

KETUA : Anak Agung Anom Purwa.  
SEKRETARIS : I Nengah Ardana.  
PELAPOR : Ida Bagus Nyoman Suwitajaya, BA.  
ANGGOTA : 1. Anak Agung Gde Anom Kalam.  
2. Anak Agung Oka Sumitra ( Mangku ).  
3. I Dewa Made Megig.  
4. I Ketut Pica.

2. BIDANG PAWONGAN :

KETUA : Anak Agung Gde Sayang.  
SEKRETARIS : I Ketut Degeng Arnaya, Bsc.  
PELAPOR : I Dewa Made Bana, BA.  
ANGGOTA : 1. Piri Kowal.  
2. Pan Lapur.  
3. I Wayan Rigege.  
4. I Ketut Sukerata.

3. BIDANG PALEMAHAN :

KETUA : I Nyoman Rupa.  
SEKRETARIS : I Wayan Suratna.  
PELAPOR : I Wayan Dauh.  
ANGGOTA : 1. I Gusti Ngurah Ariawan.  
2. I Dewa Gde Gunung.  
3. I Wayan Wirtha.  
4. Anak Agung Gde Rai Sutha.